



Australian Government

COVID-19
✓ **VACCINATION**

Cóm, dud hábáni adde COVID-19 véksin ókkol

13 Julay 2022

Comirnaty (Pfizer) ar Spikevax (Moderna) véksin ókkol or wosíyot gorágyyé hámel, dud hábár yá cóm óibar plan gorénde maiya fuwain dólla. Zodi hítara véksin ókkol iín loinofaré, toíle hítara Nuvaxovid (Novavax) yá Vaxzevria (AstraZeneca) véksin loifaribó. Maiya fuwain dé véksin gúa loifaribó cóm ór zehonó woktót.

Hámel maiya fuwain adde hítárar abiyaiya fuwa llá COVID-19 ór hora, uzan notija ókkol ór hótóra becí. Hámel maiya fuwain zaráttú COVID-19 óibó híba ttú hóspital zaar hótóra adde neháyot saásita gorá lagar hótóra becí. Hítárar abiyaiya fuwa gúa adinna óibar emkan ó bout becí (cóm or 37 háftar age óizoon) ar saásita lla hóspital zaar emkan becí tákibo.

Hótóra ókkol óre homaibólla véksin mara óiye dé beétór torika. Hítárar COVID-19 véksin marar buniyadi nesab or híssa hísafe, Pfizer yáto Moderna véksin dui (2) foijjal maiya fuwain óttu lagibó, 8 háfta duré gorí. Mazíla yáto becí báfe firazárani cók komzur goijjá yáto COVID-19 loi becí ocúk óibar hótórat aséde maiya fuwain dólla híattu beec baçí dormiyani thaim or wosíyot gorá giyyé.

Háamel maiya fuwain zará firazárani cókti becí komzur goijjá hítáraré wosíyot gorá giyyé COVID-19 véksin or oggúá tesóra foijjal, hítárar dusóra buniyadi foijjal or 2 mac baade.

Hákiki-dunyair dolil e sábut goijjéde ki zodi tuñúi dud háboór yáto cóm ola, toíle Pfizer adde Moderna maháfuz. Novavax yáto AstraZeneca loi lagaiya eén honó sólamoti sinta ókkol náí zíín neki cóm, dud hábani yáto cóm or plan gorár sáñte háas. Bahárrhal, véksin ókkol óre ahámíyot diyanoza, etolládeki, cóm ola ar dud hábarde maiya fuwain dóttu híin or sólamotir babote hom deta maalumát asé.

Háamel ar dud-hábarde maiya fuwain dé asór baróoni foijjal yáto sair or foijjal loonsá ne?

Thaim or wore véksin ókkol or héfazot goráni homizagói. Asór baróoni foijjal ókkol é COVID-19 or hora ocúk óttu héfazot óre lamba thaim ollá baráide. Háamel adde dud hábarde maiya fuwain beggún óre COVID-19 véksin or asór baróoni foijjal loibar wosíyot gorázar zodi hítara:

- 16 bosór yáto híar woror boiccá ar
- homot gelde 3 mac age hítárar COVID-19 véksin marar buniyadi nesab or akhéri foijjal loifélaiyé.

Boc 12 óttu 15 bosórjja bazu manúic oggúá asór baróoni foijjal or kabel óitfare, zodi hítara:

- firazárani cókti becí komzur goijjá
- dhoñór yáto cíyaikka sehéti hájot ókkol ola maazuri ola
- cíkyaikka ar/yá hoekkán sehéti mockilat ola ziín é hora COVID-19 or hótora ré barái diyyé.

Yaáno wosiyot gorá giyyé déki bazu háamel ar dud hábardde maiya fuwain dé COVID-19 véksin sair or foijjal. 16 bosórjja adde híar woror boicá háamel ar dud hábarde maiya fuwain dé sair or foijjal loibode hítárar foóila asór baróoni foijjal or 3 mac baade, zodi hítara:

- firazárani cókti becí komzur goijjá
- háas kensar ókkol accíl
- elaj gorá forerde héndhilla bearam asé zeçé firazárni cókti ye nizoré nize hámla goré
- hámicáiya yáto hora ocúk ókkol ola ziín é tuñár fécca, hoillá, kinai, mogoz yáto amgurdá ré asór goré
- miçá bearammya zarttú dabai gorá fore
- dhoñór yáto cíkyaikka sehéti hájot ola ekkán maazuri ola
- hódor baáre boli yáto leça.

Tuñáttu asór baróoni yáto sair or foijjal loonsá ne fakka gorí nozaníle, tuñár daktor loi hotá hoó.

Cóm abostát COVID-19 véksin luar baade emkani dhákkyá asór ókkol kí?

COVID-19 véksin ókkol or baade aám dhákkyá asór ókkol óiyedé:

- zor
- dhuñá bic
- matá hoñori
- gusso bic
- girá bic
- sórdi.

Tuñár véksin marar baade zodi tuñáttu dhákkyá asór ókkol iín honó ekkán táke, aám dhákkyá asór ókkol iín óre homaibólla paracetamol loifaribá. Cóm or hár woktót paracetamol maháfuz.

Hámel maiya fuwain adde hítárar fuwain dólla duniyai agagurar elómi tahákik ókkol é honó háas dhákkyá asór ókkol noófa. Bahárhal, yaán mumken de ki héçe hodún becí omil dhákkyá asór ókkol tákítfare ziín óre aijó elómi tahákik ókkol é noófa.

Cóm abostát COVID-19 véksin loon ottú añárar fuwa llá honó fáida ókkol asé né?

COVID-19 ola hámel maiya fuwain dóttu mora fuwa yáto adinna fuwa biyaibár hótora boút becí. Hítárar fuwain dé yó biyaibár thaim ot perecani deháitfare, yáto hósptal ot nuwa óiya fuwain dór beec saásita gorár zagat elaj or zorurot deháitfare.

Véksin mara óiye dé hótora ókkol iín óre homaibár sóbse bála torika.

Sáñisi sóbut é hoórdde ki COVID-19 véksin loibaade foida gorázade entibodi (uzan jisím) ókkol é fuwar zol-hóilla ré faráifare ar deki cóm abostát COVID-19 or khélaí véksin mariféloon gán é 6 mac óttu gura baicca ókkol óre basaite modot goré COVID-19 or zoriya hósptal ot bótti goróon óttu.

Dud hábár de maiya fuwain dólá wosíyot ókkol kí?

Dud hábár de maniya fuwain dólá Pfizer adde Moderna wosíyot gorá giyyé. Zodi tuñáttu véksin ókkol iín loínofaríle, tuñúi Novavax yáto AstraZeneca véksin loifaribá ar hían ólla tuñáttu nizor daktor hotá hoónsá.

Véksin marar age adde baade tuñúi dud hábáni jari rakí faribá.

Cóm óibar or plan gorér de maiya fuwain dólá wosíyot ókkol kí?

Cóm óbar plan gorér dé maiya fuwain dólá yó Pfizer adde Moderna wosíyot gorá giyyé. Hámel óibar age véksin mariféloon maáni gúñçá cóm ór thaim ot COVID-19 óttu tuñúi héfázot háasel goijjó. Meérbáni gorí monot raikkó dé kí:

- COVID-19 véksin marar age yá baade hámel bonoon ottú tuñáttu basi táká noforibó.
- Véksin mara ye hámel óibar cókti ré borbad node.
- Véksin marifélaibár age tuñáttu hámel né theés gorár zorurot náí.

Beec maalumát ollá

Tuñúi tuñár COVID-19 véksin hoçé faiba saibólla, gólisoó www.health.gov.au.



COVID-19 véksin ókkol ór babote zodi tuñáttu súal ókkol táké, tuñár daktor loi hotá hoó, gólisoó health.gov.au/covid19-vaccines-languages, yáto National Coronavirus Helpline loi hotá hoó 1800 020 080 ot. Buzáidiyar hédmot ólla ekteyar 8 basó.